

何大復先生集

第二册

卷之三

辭十一篇

卷之四

古詩六首

卷之五

樂府雜調四十二首

卷之六

樂府雜調四十一首

卷之七

五言古詩五十首

卷之八

五言古詩五十六首

何大復先生集



何大復先生集卷之三

五世

姪孫洪洙字曾存

六世

姪孫維基字培菴

同校訂

七世

姪孫輝少字誦芬

男八世姪孫永謙字遜齋

重梓

辭一十篇

澧有蘭辭

澧有蘭兮獨榮滋被覆沙汀兮含蕨蕤塞芳兮采綠
臨江兮暮思靈均兮弗覘心愴惻兮目眴眴蹇獨立
兮寡類嗟懷忠兮守艱理楫兮蕩丹空山兮水潺湲

九詠

紫貝宮兮瑤堂結蕙幄兮蓀牀班文豹兮兩階龍宛
宛兮翼梁設俎兮陳玉桂樽兮湛綠清灑掃兮愉穆
望靈車兮冀髣髴靈之來兮開九京欽百神兮紛往
迎忽升堂兮降席爛霏霏兮滿盈被靈服兮委委華
英英兮容裔弁列星兮嵯峨纓曲虹兮猗靡座既奠
兮安歌衆倡作兮音繁和紅顏臻兮交代舞傳芡芭
兮揚纖羅拊鳴鼓兮循玉瑟樂齊會兮衍淫泆歟眇
眇兮覲以密靈之娛兮不終日靈之車兮倚桂旗駕
玉駟兮駉文螭御飄風兮乘輕霞返層霄兮超九達

來不語兮去無為目睠睠兮令予思予遊兮北渚往
媵兮帝女水衝波兮潺湲木蕭蕭兮葉下折蘭蕤兮
將若華杳冥冥兮空望予予朝兮北遊夕邁駕兮冀
州覽文昌兮朝東皇冰霰凜兮不可留朔飈振兮元
雲黝顧窮原兮增百憂肆改轍兮西逝遵少皞兮故
域素陰肅兮裂肌灝凝凝兮罔極積霜周兮如陸靈
之處兮安測晞溫暾兮扶桑訊靈居兮陽阿六鰲兮
載山冲天兮高駝蔽日兮濤來下徒翹首兮奈汝何
訪靈遊兮南麓悵赤華兮不燭有獸兮黑斷有虺兮

綬腹瞰朱海兮炎霧濁胡軒
軫兮不我復嗟四方之
與上下吾又安知其所尋
疑神鑑之莫邇豈予心之
靡忱羞蕙肴以罔薦蓄潔
粢而孰欽睇孔鸞之翠蓋
像蒼虬之玉音下土幽暗
而嶮巇兮需光澤之照臨

雨頌并序

歲戊辰五月不雨至六月土脉龜坼井汲不給禾則
半偃民實憂作動而轉徙者擾不可禁矣是月己亥
雨庚寅復雨人於是乃有秋望稍定逋志予既為憂
旱賦矣茲則喜而有頌焉曰

后皇惠鮮終悔其傷天覆之彌雨之洋洋有煜其電
有震其雷何煜何震載濟其施甫田之圻陰液膏之
爰高爰亢腴之饒之灌灌黃流周原廣隰膏之陰之
土絡斯釋卉則烝矣樹則升矣彼禾之苗勃其興矣
從橫其委維秀驕驕維實繁繁有獸般般亦斑其皮
鳥集于林載澤其儀相彼物矣既鞠既靡自我天作
乃奮而起嘉穀之有萬福是來猗予民哉侯不綏哉

甘露頌

皇嗣元載仲月維冬茂彼陵木甘露以降溫風來臻

柔惠周渥湛湛瀼瀼既塗既溽如葩斯敷如實斯搏
精華內融純白有爛寔維和鍾昭我皇穀彬彬庶徵
厥來多福昊天棐忱冥冥罔常於皇克德受此嘉祥
告咎文

露雲暗藹彌元穹兮皇鸞儻回鵬屬矦兮鬱氣忍泮
迅飈風兮澤渥頑滯不下降兮七曜弗列五緯汨兮
北斗亂精貫日月兮白彗出地芒四發兮陰陽離職
互驕越兮奔震隆露輾長林兮爲慄獸亡鯨鰲豈兮
雨雪千里電交侵兮川陸不分水溺淫兮嗚呼后皇

兮愁不我哀蒞下土兮播害菑我蠢兮寡辜昧茲咎
兮曷來升九閭以陳詞兮仰憑翼而訊之予使列缺
以啓途兮擾白螭以服輶乘元冥以承行兮乃覲帝
于太微既予忱以聽進兮告弗祥于帝側含萬物以
化光兮胡格和于九域敷乾始之美利兮運不息之
元德飭望舒以馳範兮戒羲和以正御禁雨工之濫
施兮屏雷師之妄驚俾星弗易次兮天弗改度外紫
宮兮內鈎陳申耀魄兮理鴻鈞御群靈兮秉萬神分
列耀兮朝北辰又使北斗以振紀兮命輔星以佐之

定二儀之元本兮操七政之樞機中四方以臨制兮
均五行而建四時視九達之蕩蕩兮履三階之平平
駕天廐之元駟兮啟璿璣與玉衡樹蚩尤以為旗兮
檻彗星以為旌驅虹電以前導兮叱攬搶使先征太
白隱隱以晝斂兮熒惑退而守明上下既奠位兮日
月攸行麒麟遊于四野兮虺蛇潛以屏藏鴈鷖鸛鵲
不敢鳴兮鳳凰昭其文章孽誕弭息兮永昇綏康終
予言以告旋兮俯茫茫以容與天黝黝以沈寥兮雲
冉冉而忽雨予藪赤華以照地兮令燭龍以耀宇回

軒車以長辭兮風颯颯而愁予

七述

并序

枚乘作七發曹子建作七啟張景陽作七命皆通為
擬襲予病居客有述遊觀之盛以啟予者凡七事乃
作七述

胎簪子為舍人病弗能朝謁脫籍納組買車以還還
而謝姻戚杜慶弔却除塗戶塊焉以居客有冠危冠
服濶領綦履佩玦造門辭曰竊聞子病謝客客願有
以見也胎簪子謝弗見者三客曰竊聞子病謝客客

有說于子願有以見也於是胎簪子乃敷文純之席
布瑤華之几啟扉以入下榻以俟客望見曰子何病
之深也吾相子之病非有窒于腸胃結于腠理瘀于
血氣而滯于骨髓者也若有伏憂綿綿纒纒糾纏于
心惟思所起子何病之深也夫腸胃血氣之病可以
湯浣醴灑腠理骨髓之病可以鑱石灸熨皆宜獨攝
靜息不可勤擾而子之病病于憂也獨則愈生靜則
愈積絲分縷起將不可止非有效于湯浣醴灑鑱石
灸熨也顧乃堅戶謝客斂聰寐視吾見子之病日甚

也吾聞目不蔽則神暢耳不塞則志廣體不局則氣伸吾將述遊觀之盛以語子使子目快于視以暢其神耳快于聽以廣其志體快于動以伸其氣而子病去矣胎簪子曰辱客枉造請試言之敢敬服聽

客曰神都天府之國四通五達之關繚以濬塹表以周原乃有元居造天崇基冠山周欄連樓曲屋層軒升高入奧莫知其端飛甍接題交䟽迴欄上通中窰下旋井幹俯觀次鱗仰接飛翰盤紆焉綸網焉翼翼焉班班焉邈不知其所攀也而又環以百里之危垣

延以千步之脩廊炫以瑱璧丹楹植以釳砌雕牆錯
以綸綺雜施元黃揭層虛而照八埏迷五緯而眩三
光中有元室煜朱陽兮夏屋寥寥含淒霜兮阿閣崔
巍雕沉香兮櫟題逶迤刺沙棠兮輕杉為祝文杏梁
兮鳳鶯隱起蛟龍驤兮乃御飛櫺升廣堂兮若是者
可謂宮室之盛者也吾與子往遊可乎胎簪子曰吾
聞瓊宮瑤臺夏以焚臨春結綺陳以亡彼萬乘之主
猶不可也而吾處草野編蓬戶以為安者奚事此遊
也

客曰乃有上都貴人戚里公子迎晨而出及暮乃止
入饌八珍出布千駟車馬雜沓絡如流水爾其襲白
縠服文裘陋黑貂而不御輕狐白之莫儔燦三英以
外飾誠五紵之可羞躡飛雲之履被明霞之紬水蠶
瑩膚藻龍耀眸綴以錦帶懸以吳鉤斷犀剗象斬蛟
割虬輾轡流光芙蓉照秋文王銜英不足比步光懸
璃莫為酬於是驟騰駕憑華軒施通幃秉脩矛蹇歲
蕤之飛蓋張連蜷之翠旂蔽羽旂於日表布絲帳於
道周馬則驊騮赤驥紫燕青驪漉漉師師駢駢駢駢

踴躍騰驤礪魄權奇雲駿霧鬣電駛煙馳控以寶鉸
纏以金羈銀鞍燿爚繡軔生輝乃出黃金擲白璧家
多匿亡門有食客意氣傾人風聲下敵雖秦楚之豪
束手而莫抗而燕趙之英不敢比肩而與匹也若是
者可謂服食輿馬之盛者也吾與子往遊可乎胎簪
子曰彼皆崇權貴任豪俠危上以弱下厚積而過享
者也吾布衣藜藿之士奚事此遊也

客曰三五冶容二八曼姬容華眇好豔多姿兩輔善
笑承重頤臙頸豐肉宜細肌長眉連娟曲中規擗腰

擢步隨風移左右盼睠目波施窈窕善戲體迅飛爾
乃結脩髻之嵯峨襲芳澤之烈薰珥明月之步搖服
素霓之繽紛垂羅掩縠攢簪合苗明滅纖霧綽約繁
雲於是進舞席御歌宮奏大呂扣黃鐘嗽鼓搖虞按
瑟撾鏞笙竽共逐金石和同衆音繁會殷於層空既
而停衆樂拂雲和出嫚舞流纖歌歌曰長裙單衫曳
鳴璫吳娃雙歌出洞房不惜緩步升君堂華燈錯兮
夜未央於是醉酣雜坐弛帶纓授贈詩賦顛倒疊
疊衆客出坐蘭膏不明美人侍傷逸態橫生乃歌曰